

Aruba a conmemora 80 aña desde cu e heroe nacional Boy Ecury a ser fusila

Ayera mainta na Parke Boy Ecury a tuma luga e ceremonia solemne relaciona cu Dia Nacional pa Conmemora tur luchado di resistencia Nacional y den Reino. E aña aki ta 80 aña pasa cu Segundo Jorge Adelberto Ecury, miho conoci como “Boy” a ser fusila y riba e fecha special aki a rindi homenahe na e heroe Arubiano y alaves a desvela complementonan nobo na Parke Boy Ecury cu ta conta mas di e historia di e heroe nacional.



Un mainta cu den presencia di su Excelencia Gobernador di Aruba Alfonso Boekhoudt, presidente di Parlamento di Aruba Raymond Kamperveen, prome minister demisionario Evelyn Wever-Croes, minister demisionario di Finanzas y Cultura Xiomara Maduro, representante di Hulanda na Aruba VNOA Vincent Storimans y invitadonan di departamentonan di gobierno, organisacion- y scolnan a rindi homenahe na e heroe Arubiano.

Boy tabatin apenas 22 aña ora cu riba dia 6 di november 1944 el a ser fusila. Na december di aña 1946 Reina Juliana a manda un carta pa Boy su mayornan pa gradicinan pa Boy su trabou den e resistencia. Despues di guerra a haya e restonan mortal di Boy y dia 15 di april 1947 Boy a haya un entierro oficial na Aruba den presencia di tur su famia y pueblo dui Aruba.

Na november di aña 1949 a rindi homenahe na Boy Ecury cu un monumento di

su busto cual ta situa na Parke Boy Ecury y di e manera aki pueblo di Aruba a duna honor na e heroe Arubiano. Na 1984 famia Ecury a ricibi e verzetsherdenkingskruis.

Durante ceremonia solemne ayera mainta a haci entrega di e verzetsherdenkingskruis na pais Aruba y esaki a ser ricibi pa prome minister demisionario Evelyn Wever-Croes. Na su turno e mandatario a haci entrega di verzetsherdenkingskruis na director di Archivo Nacional Aruba pa



asina esaki por bira parti di e exposicion di herencia cultural di Archivo Nacional

Aruba Open Beach Tennis Championship ta priminti di ta mas grandi cu nunca e aña aki



Aruba Open Beach Tennis ta acercando rapidamente y e aña aki ta priminti di ta mas grandi cu nunca. E aña aki e edicion ta mas special ya cu Aruba ta anfitrión pa Pan American Championship 2024 tambe. Organisador di Aruba Open Beach Tennis y Pan American Championship, Sjoerd de Vries, a brinda informacion importante pa comunidad di Aruba.

De Vries a splica cu e Pan American Championship ta un warm up pa e Aruba Open Beach Tennis y tin 17 pais participando e aña aki. Esaki ta di cinco biaha cu e

campeonato aki ta tuma luga na Aruba.

Apertura di e Pan American Beach Championship ta tuma luga awe tardi y mañan mainta ta tur e weganan oficial ta cuminsa na Beach Tennis club na Eagle Beach.

De Vries a duna un actualisacion tocante e neishi di shoco cu t'ey ainda na e center court di e stadion di beach tennis. El a enfatisa cu Aruba Open Beach Tennis ta trahando hunto cu instancianan encarga pa haci tur cos posibel pa e bienestar di e shoco. El a informa cu a traha un neishi di shoco nobo pa e shoco por muda.

De Vries a enfatisa cu e aña aki ta un aña di kibra record pa Aruba Open Beach Tennis ya cu nan ta cerca di 1,500 participante. “Nos ta hopi emocionado pa e aña aki,” el a expresa.

E aña aki e torneo tin casi 100 mil dollar na premio, cual ta demostra un aumento substancial compara cu aña pasa cu tabata 60 mil demostra. E aña aki tambe tin mas cancha, 45 cancha, y e stadion tambe ta mas grandi compara cu aña pasa.

De Vries menciona cu e aña Sand Series, “grand slam di beach tennis” tambe ta back na Aruba. El a splica cu tin algun torneo na mundo di Sand Series y Aruba t'ey back riba kalender cu e premio cash mas halto na mundo.

El a enfatisa cu e Aruba Open Beach Tennis no ta solamente pa e deportistanan pero tambe pa e publico ya cu cada tin entretenimento, musica live, DJ live y hopi ambiente pa pueblo di Aruba disfruta. Un cambio grandi cu tin e aña aki ta cu pa prome biaha



ta cera e evento y esaki, De Vries a indica, tin di haber cu seguridad y riba consejo di Cuerpo Policial. Esaki ta nifica cu ta bay cobra un entrada di 20 dollar pa tur ocho dia di evento. Massimo Morelli di parti di International Tennis Federation y ken lo ta e referee na ambos torneo, a conta cu desde 2012 ta referee di e torneo aki, faltando solamente un edicion. El a enfatisa cu cada aña e torneo ta mas grandi y e aña aki ta e edicion mas grandi di e historia di Beach Tennis Aruba den termino di cantidad di referee

Morelli a conta cu ora e torneo a cuminsa tabata solamente su persona como ref-

eree y awendia ta 22 referee pa e dos torneonan.

El a agrega cu e Sand Series na Aruba e aña aki ta hopi importante pasobra e final di Sand Series e aña aki ta na december y probablemente e ultimo puntonan pa cualifica ta ser dicidi durante e torneo aki.

Pa culmina e conferencia di prensa Sjoerd de Vries a extende su invitacion na henter pueblo di Aruba pa yega y gosa di Pan American Championship como tambe e Aruba Open Beach Tennis. “Bin gosa di e partidonan y entretenimento cuminsando desde 10 di november te 17 di november.”